

Arrantzale gaxoa...

(Amalaukoa)

Negu beltz, illuna da... ta arrantzale artean
Orain ezin bizia, gose aundi ta otza.
Errian danak ixil... surik ez sukaldean,
Ta ume gaxoengatik amak itun biotza.

Itsasoa txar dago, guztiz asarratua...
Ta arrantzale azkarra ogia irabastera,
Ontzi txiki batean, indarka, nekatua,
An dijoa itsasora, arraia arrapatzera.

Ortzean odei beltzak, non-nai aize aundia...
Itsasoa horrokan asi da mendiakin,
Eta arrantzale onak orain galdu bizia...

Etxean, ama bere umetxo kutunekin
Aita maitearen zai, yateko ogi zuria;
¡Aita betiko datza urpean arraiakin!

Gabon eguna

Gabon eguna,
Egun zoruna...
Goiko mendian otz, elurra...
Etxean bero,
Apari ona,
Biotzean alaitasuna...
Danak ospatu desagun
Pakean, gaurko gabona.

* * *

Biotz guztitik
Gurtu desagun
Belen'go aur jaioberria...
Gugatik otzez
Dar-darka dago,
Zeru-lurreko izar-argia...
Muxuka bero desagun
Jauna'ren seme maitia!

Maite zaitut

Loretxo zoragarria,
Maite zaitut biotzetik...
Urrun bizi zeralako
Ni beti ezin etsirik...

Txoriñoaren egalak
Nerekin nai nituke nik...
Zugana arin yoateko
Besarkatzera poz-pozik,
Maite!

Lotxo bat egiten

Udaberria da... Txoriñoak non-nai
Poz-pozik abesten...
Zuaitz danak ostoz, yantziak orlegiz,
Loreak yaiotzen.

Udaberria da... Amatxo maitea,
Atsegiñez dago.
Aurtxo txit polita, gaur yaio berria,
Seaskatxoan lo...

Aur txiki gaxoa, orain esnatu da...
Begiak zabalik...
Irri-barrez dago, amari begira...
Ez du lo gogorik.

Amak abesten du:
"Egin zazu lo-lo,
Ai, nere kutuna;
Lo eiteagatik
Nik emango dizut
Zuk gura dezuna.
Tunkurrunkutunku...
Tunkurrunkutuna...
Loooo... loooo...".

* * *

Negu beltz, txarra da... Txoriñoak otzez,
Ez dute abesten.
Zuaitzak an, emen, osto eder gabe,
Loreak igartzen.

Negu beltz txarra da... Amatxo maitea
Samindua dago.
Aur txiki gaxoak, iñolaz seaskan
Ezin du egin lo...

Amak abesten du:
"Egon bada ixillik
Ai, nere kutuna,
Zu sendatzearren
Nik emango nuke
Nere ontasuna.
Tunkurrunkutunku...
Tunkurrunkutuna...
Looo... looo...";

.....

Aur txiki gaxoa, orain geldi-geldi...
Begiak itxirik...
Lotxo bat egiten... ixil, ixil-ixil...
Seaskan dago illik.

